

摘藻堂四庫全書薈要

經部

欽定四庫全書薈要

經部

詩總聞卷十三至
五



欽定四庫全書薈要卷九百十五


經部

詩總聞卷十三

宋 王質 撰

谷風

一章

 習谷風維風及雨將恐將懼維予與女將安將樂女轉棄予

此必同經患難而他時稍達棄恩忘舊者也

二章

習習谷風維風及頽將恐將懼寘予于懷將安將樂棄予如遺

頽雨圯山也亦雨也

三章

習習谷風維山崔嵬無草不死無木不萎忘我大德思我小怨

草木長則山愈高

聞音曰女忍與切予演女切懷胡隈切怨讀作德

西北人相怨恨之聲此字以聲取旁紐作越亦可叶德

總聞曰谷風春風也正草木發舒之時當是其人得時逞志如草之繁如木之茂有莫已若之意恨者以為無不死之草無不萎之木言無不卒之人生幾何而惡薄如此恨之辭也

蓼莪

一章

蓼蓼者莪匪莪伊蒿哀哀父母生我劬勞

二章

蓼蓼者莪匪莪伊蔚哀哀父母生我勞悴

非莪即蒿非莪即蔚目前唯有此物更無他見父母
生我本欲增光門戶今乃索居田野如此嘆惋之辭
也

三章

餅之罄矣維壘之耻鮮民之生不如死之久矣

鉞既罄壘又耻言窮甚鮮民之生言墮于生也既無
一為生不如死也久言當死已久至此已過也

四章

無父何怙無母何恃出則銜恤入則靡至

當是父母鍾愛有託不如所願而亡出門則銜憂口
如不能出聲也入門則無所至身又如不在家也大
率口有所銜則聲不發神有所亂則目不識憂思之
極也

五章

父兮生我母以鞠我拊我畜我長我育我顧我復我出入腹我欲報之德昊天罔極

欲報而不能報也

六章

南山烈烈飄風發發民莫不穀我獨何害南山律律颼風弗弗民莫不穀我獨不卒

人莫不有穀為食何我獨乏當是父母亦以傷貧遂

至棄背故此人之辭若有不可存者

聞音曰蔚紆冑切害何葛切

聞跡曰兩章皆稱南山故知居南山之下也

總聞曰毛氏父母病亡在役不得見尋詩不見此意當是不遇之窮士居南山之下遇苦寒之辰銜哀抱貧人不能堪則欲死蓋常情也

大東

一章

有饌簋殮有捄棘七

大東小東具見此詩無別有小東也簋則殮者也七
取殮者也當是士大夫會集之間有見道路平直貴
賤往來動念興哀思往日而傷今日也

周道如砥其直如矢君子所履小人所視瞻言顧之潛
焉出涕

二章

小東大東杼柚其空

當是周道之側有大東山小東山俱在東而以大小
別之也

糾糾葛屨可以履霜佻佻公子行彼周行既往既來使
我心疚

葛屨公子行周行之屨也公子如此下民可知安得
不傷心

三章

有冽沈泉無浸獲薪契契寤嘆哀我憚人

此遇寒涉水而載薪者也以為沈泉勿浸我薪濕則不可焚也此亦謂公子也

薪是獲薪尚可載也哀我憚人亦可息也

薪雖濕尚可用也小人以勞致病則恐不可生願生息也皆公子之徒愬貧勞之辭也

四章

東人之子職勞不來西人之子粲粲衣服舟人之子熊羆是裘私人之子百僚是試

此詩當是傷怨王室之詩是時周已遷東而秦踞西
在東者憚所職之勞不肯來服王事在西者又逞勢
得志而蔑視在東者也舟人水工之人私人家僮之
人皆西人也

或以其酒不以其漿
鞞鞞佩璲不以其長

言舟人私人之徒皆酣于酒而不用漿務淳美也皆
華其佩而不用長務輕捷也言西人得意如此而東
人徒勞而甚窮嘆其不如西人也

五章

維天有漢監亦有光跂彼織女終日七襄雖則七襄不成報章

皆服勞之極逮夜及曉不休據所見道所懷自此而下天漢織女牽牛啟明長庚捄畢南箕北斗是也

六章

睨彼牽牛不以服箱東有啟明西有長庚有捄天畢載施之行

七章

維南有箕不可以簸揚維北有斗不可以挹酒漿維南有箕載翕其舌維北有斗西柄之揭

宋氏所謂心悚惕而震盪何所憂之多方仰明月而太息步列星而極明指星起興也

聞音曰行戶郎切來六直切疚訖力切載節力切服蒲北切裘渠之切試申之切旁紐則然易可貞無咎固有之也無妄之藥不可試也庚古郎

切揭居竭切

總聞曰有指君不明者天漢是也有指臣無用者織女
牽牛啟明長庚畢箕斗是也東西南北無不周覽興懷
大率首章睠言顧之潛焉出涕此其真情之大端也

四月

一章

四月維夏六月徂暑

當是初夏出征歷秋歷冬又次年歷春歷秋在道凡

經年有餘尋詩可見

先祖匪人胡寧忍予

我先祖獨非人而何為忍于我也此必其祖在位有
勞而其後為有力者所不容也

二章

秋日淒淒百卉具腓亂離瘼矣奚其適歸
日色慘七月候也

三章

冬日烈烈颼風發發民莫不穀我獨何害

日色寒十月候也

四章

山有嘉卉侯栗侯梅廢為殘賊莫知其尤

此登山有見也栗熟八月後梅熟五月後也

五章

相彼泉水載清載濁我日構禍曷云能穀

此臨水所見也泉水彼清而復濁雨多泉溢也水生

三月後也

六章

滔滔江漢南國之紀盡瘁以仕寧莫我有

此從事江漢之間也

七章

匪鶉匪鳶翰飛戾天匪鱣匪鮪潛逃于淵

此仰觀飛俯視潛有見者也我非羽焉能飛我非鱗
焉能潛言無所避害也

八章

山有蕨薇隰有杞桋君子作歌維以告哀

草木生三月後也大率年餘在外道塗江山之間可謂盡瘁而不知有我視若無人可謂太無情是可哀也

聞音曰予演女切害何葛切尤于其切濁厨玉切有羽軌切哀於希切

總聞曰自謂為君子所以自別于小人也

北山

一章

陟彼北山言采其杞

杞枸杞也仲春可食當是此時

偕偕士子朝夕從事王事靡盬憂我父母

二章

溥天之下莫非王土率土之濱莫非王臣大夫不均我從事獨賢

賢如某賢于某若干純之賢言其勞獨過于人也

三章

四牡彭彭王事傍傍嘉我未老鮮我方將旅力方剛經
營四方

以我少壯而使我陳力固當然但不均為可恨耳

四章

或燕燕居息或盡瘁事國或息偃在牀或不已于行或
不知叫號或慘慘劬勞

五章

或棲遲偃仰或王事鞅掌或湛樂飲酒或慘慘畏咎或
出入風議或靡事不為

此所謂不均也

聞音曰事上止切下後五切賢下珍切今東人猶
有此音彭鋪郎切國越逼切行戶郎切議魚羈
切今西人猶有此音佛書思議讀作宜大率西
音多然

聞訓曰嘉鮮皆美之辭今人猶呼少壯為鮮健

總聞曰不均歸咎于大夫大夫以君命而役庶位者也
大率詩人于君多婉

無將大車

一章

無將大車祇自塵兮

不必將大車當時大車皆小人乘之我乘大車亦與
小人同倫但自污而已

無思百憂祇自疚兮

二章

無將大車維塵冥冥無思百憂不出于頰

言憂思無精采也今人猶呼物陳弊為少出治治讀
作持

三章

無將大車維塵雍兮無思百憂祇自重兮

聞音曰疚眉貧切疚當通作瘼集韻與瘡同皆病

也吳氏以字書氏氏多互用蓋經唐諱從氏皆改從氏後有復者有不復者且如緡緡一也而有兩從鐸鐸一也亦有兩從秦諱改正月遂以仄為平至今不改況唐三百年又重之以五代之唐江南之唐習熟不全改易爾冥莫迴切重直龍切

聞訓曰雍壅也北人猶作此音

總聞曰賢者不願居高位居高位則任重事世態若此

高位不可居重事不可任莫若自顧為安三章連稱三
自自者已也使人懷此心安得不亂

小明

一章

明明上天照臨下土我征徂西至于朐野二月初吉載
離寒暑心之憂矣其毒太苦

徂西徃舊都也此必有求于秦而識者知秦之心無
厭是豈可倚如被毒而又至苦言毒之深也朐說文

遠荒也引此至于亢野一曰獸尊

念彼共人涕零如雨

共人在朝之相知也不堪在外之惡境故思在朝之相知至于淚滂流首重回又甚于夜卧起宿于外不能宿于內也念之極也

豈不懷歸畏此罪罟

固知其無成而思歸必以為我為懷私不辦事也置我于罪罟加我以譴怒甚至于使我再行尤不可堪

也

二章

昔我往矣日月方除曷云其還歲聿云莫念我獨兮我
事孔庶心之憂矣憚我不暇念彼共人惓惓懷顧豈不
懷歸畏此譴怒

除開也言天氣方開明也二月後

三章

昔我往矣日月方輿曷云其還政事愈戚歲聿云莫采

蕭獲菽心之憂矣自貽伊戚念彼共人興言出宿豈不懷歸畏此反覆

輿煖也言天氣方暄煖也四月後二章歲聿云莫亦參差古作欲語健

四章

嗟爾君子無恒安處靖共爾位正直是與神之聽之式穀以女

五章

嗟爾君子無恒安息靖共爾位好是正直神之聽之介爾景福

前三章此念彼共人故稱我稱彼後二章彼嗟爾君子故稱爾稱女以為進則嬰外藩之釁退則詒內朝之譴進退故不能逃禍但不以偷安為念而以靖共正直為懷神必相扶而可免患相寬之辭也

聞音曰野上與切除直慮切莫慕故切暇胡故切
戚子六切福筆刀切

總聞曰自二月初吉至歲聿云暮所歷期年是時平王以陝西子秦以河內子晉既以謝二國之援且以資二國之助自秦仲已張至是立西時秦時密時漸進汧渭之間盡包關輔之地故以王命使西土者皆恐蹈不測也秦以虎狼處已以魚肉視人其來已久著于孝公成于始皇當時有識者必先覺之

鼓鐘

一章

鼓鍾將將淮水湯湯憂心且傷淑人君子懷允不忘

二章

鼓鍾喈喈淮水湑湑憂心且悲淑人君子其德不回

三章

鼓鐘伐鼗淮有三洲憂心且妯淑人君子其德不猶

大率淮夷叛服不常當是前此既服至此又騷將帥
經理者合樂臨戎以此夸耀下國而懾服夷心識者
憂其不可故以美辭曉將帥爾懷至信彼且感服其

次以正以斷此事不患難辨回曲也猶疑也古稱猶
豫猶多疑之獸也語曰猶之與人也出納之吝謂之
有司言有司出納遲疑吝惜如猶之狀故謂之惡今
併載于此

四章

鼓鐘欽欽鼓瑟鼓琴笙磬同音以雅以南以箏不僭
鼓鐘瑟琴笙磬簫凡七器雅南凡二音諸器皆用二
音儀禮歌者闕雉鹿鳴等今存笙者南陔由儀管者

新宮等今亡歌有辭今伊州渭州之類是也笙歌無辭有腔今四六句合之類是也有辭者多存有腔無辭者多亡蓋無辭故難傳

聞音曰將七羊切湯戶羊切啗居奚切潛弦雞切
馨居尤切南尼心切偕亡心切

聞跡曰三洲在山陽

總聞曰漢以亡為無無其辭但有其題也以題推之其義略可見如此則可所謂惟存其義而逸其辭恐無是

理也識者更詳今甲子句中無戌亥甲戌句中無申酉之類謂之空亡亡亦無也非漢字猶爾古語多然至後誤呼之元祐間善政網舉而網踈首選劉棠大統一王勞心四方法三尺以雖具獄一人而使亡用西漢天下亡一人之獄棠天下名儒猶誤呼以為常誤呼可也而義亦隨變則有所不可此類甚多今併載于此

楚茨

一章

楚楚者茨言抽其棘自昔何為我藝黍稷

抽拔也除也拔除茨棘而藝黍稷自昔者謂后稷也
下詩言自古亦謂后稷大凡詩人言祭祀必以農事
起辭言農事必以祭祀續辭言農事祭祀必以福祿
結辭三者未有關一者也

我黍與與我稷翼翼我倉既盈我庾維億以為酒食以
享以祀以妥以侑以介景福

此總言享祀妥侑而助福也

二章

濟濟跄跄絜爾牛羊以往烝嘗或剝或亨或肆或將祝
祭于禘祀事孔明先祖是皇神保是饗孝孫有慶報以
介福萬壽無疆

此總言牲牢既具先使祝致祭于門然後延尸入坐
也禮設祭于堂禘于外

三章

執爨蹠蹠為俎孔碩或燔或炙君婦莫莫為豆孔庶為

賓為客獻醕交錯禮儀卒度笑語卒獲神保是格報以
介福萬壽攸酢

此次言俎豆各獻而祖尸為主餘昭穆為賓客亦皆
有尸大率禮皆以坐代死貴通情也所謂事死如事
生事亡如事存

四章

我孔熯矣式禮莫愆工祝致告徂賚孝孫苾芬孝祀神
嗜飲食卜爾百福如幾如式既齊既稷既匡既勅永錫

爾極時萬時億

此次言俎豆甚乾飲食畢盡也進飲進食中禮無愆也工祝致神意以告孝孫初一章止言福之大而不言福之數二章三章言萬至此自百至萬自萬至億徂賚于是為多也

五章

禮儀既備鐘鼓既戒孝孫徂位工祝致告神具醉止皇尸載起鼓鐘送尸神保聿歸諸宰君婦廢徹不遲

孝孫始離位而立庭既受賚則往歸位也工祝以畢告尸乃起而歸宰廢主婦徹器各隨其職而既其事也不遲者纔送尸即享福受胙也禮君親牽牲大夫賚幣而從君親制祭夫人薦盎君親割牲夫人薦酒卿大夫從君命婦從夫人宰卿大夫以下也君婦君夫人以下也

諸父兄弟備言燕私

諸宰君婦亟疾廢徹以享神之物及致祭之人所謂

飲福受胙也尊屬如諸父者皆與卑屬如諸弟者皆與中屬如諸兄者皆與三者總諸屬也所以言備言私
六章

樂具入奏以綏後祿爾殽既將莫怨具慶既醉既飽小
大稽首神嗜飲食使君壽考

樂飲福之樂也不特暫安而仍有后祿殽受胙之殽
也不特無怨而又皆有慶所願如此也方在祭尸為主
故稱孝孫及飲福君為主故稱君凡祭事祝嘏稱

主人曰孝孫主人自稱曰曾孫大率周禮皆宗后稷故皆稱曾孫也

孔惠孔時維其盡之子子孫孫勿替引之

禮既順物又時享祀之道盡矣惟勿廢而長行之此皆美辭末有戒禮為大順次之

間音曰祀逸織切福筆力切亨鋪郎切祊蒲光切
明謨郎切享虛良切慶墟羊切踏七略切碩常
約切矣陟略切莫末各切客克各切度徒洛切

獲黃郭切格剛鶴切愆起巾切備蒲北切戒訖
力切位力入切周官建國之神位故書位作力
鄭氏云立讀為位同字古文春秋公即位為公
即立鄭氏以二字當同為位知其一未知其二
也既可同為位亦可同為立左氏賦以日叶位
江氏詩以位叶匹信古有此音也告古得切奏
臧后切旁紐千木切叶祿慶墟羊切飽補椒切
考去久切盡予忍切引一忍切

聞人曰神保尸之贊相也凡享凡酢凡歸皆贊相導之保氏掌祭祀之客恐亦是此職

總聞曰此詩本末甚詳禮祭稱孝孫孝子以其義稱曾孫某謂國家也祝嘏稱其義故曰孝主人于國于家皆稱次故稱曾尸神象也祝將命也夏立尸而卒祭商坐尸周旅酬六尸三昭三穆與太祖而七后稷太祖也后稷之尸發爵不受旅其旅者太祖以次也傳主人辭於神曰祝傳尸辭於主人曰嘏其文載于經傳甚多亦不

無相牴牾擇其明簡者一二略載之

信南山

一章

信彼南山維禹甸之昉昉原隰曾孫田之

稱禹即是稱稷書先命禹作司空次命棄為后稷言
水土稼穡相維皆為急也

我疆我理南東其畝

古制畝法鄉南而帶東不言東南而言南東也平田

四方皆一制蓋疆理所經遂上之徑溝上之畛洫上之塗澮上之道川上之路以達于畿皆背畝而面畿畝在東南畿在西北古者正塗皆取定域非若今有小路有义路也所謂欲使齊之封內盡東其畝惟吾子戎車是利無顧土宜蓋晉嚮齊直東則順自南而東則違亦引此事

二章

上天同雲雨雪雰雰之以霖霖既優既渥既霑既足



生我百穀

麥欲雪先雪滋麥禾欲雨次雨滋穀故曰益之言得雪之後又加得之雨為佳雪當在冬雨當在春夏斯為時也

三章

疆場翼翼黍稷或或曾孫之穡以為酒食畀我尸賓壽考萬年

尸主又有尸賓皆代為神者也既卑尸主又卑尸賓

當是楚茨大祭尸主尸賓同享此小祭后稷不與而獨以次也大率大祭亦于后稷之尸以遠故加嚴所謂不受旅也

四章

中田有盧疆場有瓜是剝是蒞獻之皇祖曾孫壽考受天之祜

瓜熟而薦廟也當是夏時此薦新之祭差小故其禮比楚茨蒸嘗之祭差間

五章

祭以清酒從以騂牡享于祖考執其鸞刀以啟其毛取其血膋

雖薦新亦用牲但不用大牲禮薦冰以盥薦麥以彘薦含桃以雛薦麻薦稻皆以犬惟薦鮓薦魚薦穀無牲此薦瓜之牲也商周鼎鬯多作子象持刀度當時事神主人自執刀割牲舞自秉干戚籍田自秉耒耜之類也騂色牡形他皆可

六章

是烝是享苾苾芬芬祀事孔明先祖是皇報以介福萬壽無疆

楚茨烝嘗之祭也其儀差詳信南山薦新之祭也其儀差略下章再田社祭社以方也大田蜡祭蜡亦以方也皇祖謂太王王季先祖謂文王考謂武王大率當祭止自太王以下謂之近廟故此皇祖有獻無享也

聞音曰田堂練切今人亦呼作田為佃田呼農家
為佃戶皆作去音吳氏佃作池隣切田作池因
切又皆作享年切不若從本音為順畝滿罪切
渥烏谷切易林春多膏澤下潤係渥稼穡孰成
畝獲百斛止用此詩是知上天同雲至生我百
穀六句包春夏冬三時非止一時也或于逼切
年禰因切瓜攻乎切祐候古切考去久切享虛
良切明謨郎切

聞跡曰大率田井之制一夫居一廛田百畝此則
上中下地皆同上萊五十畝中萊一百畝下萊
二百畝謂不耕而陸種者也今一夫一戶也餘
夫一戶之行出者也亦在一戶受廛受畝之內
猶今言予戶古之度量皆極短于今若如舊說則
地太寬人太少有所不足如今所計人力地力
皆相當無遺也

總聞曰兩詩皆言祀事孔明所謂逮闇而祭日不足繼

之以燭古以為非至室事交乎戶堂事交乎階質明而
始行事晏朝而退古以為是孔明蓋謂此也

詩總聞卷十三

欽定四庫全書薈要卷九百十六

經部

詩總聞卷十四

宋 王質 撰

甫田

一章

倬彼甫田歲取十千

孔氏凡詩之作非如記事之書必詳度量之數甫田言歲取十千亦猶訟之萬億及秭舉成數且叶具所在大田皆有十千之數以見天下皆豐此說甚通他

皆倣此

我取其陳食我農人自古有年

以舊儲者食以新收者積新陳相因自古遇豐年其
法如此漢常平之制畧似

今適南畝或耘或耔黍稷薿薿攸介攸止烝我髦士
田野亦有髦俊于種藝之間有餘力則助人無餘力
則止所可審察其人之賢否也

二章

以我齊明與我犧羊以社以方

齊整也明潔也言穀之精也唯為社事單出里唯為社田國人畢作唯社丘乘共粢盛此為社所共者也我田既臧農夫之慶琴瑟擊鼓以御田祖以祈甘雨以介我稷黍以穀我士女

田祖鄭氏先嗇神農司嗇后稷凡國祈年于田祖吹豳雅擊土鼓以樂田畯田畯恐亦是田神若是田官不當于大神同饗

三章

曾孫來止以其婦子饁彼南畝田畯至喜攘其左右嘗其旨否

七月略同辭至喜不必改為饁言迎其神既至而喜也君勞田見之却其左右而嘗其義否與下通懷如此也古禮凡祭神皆有尸今所在尚有此風然多流于邪怪也

禾易長畝終善且有曾孫不怒農夫克敏

禾所以易長者以人之克敏也人道敏政地道敏樹凡稼事以敏為功所謂痔乃錢鏐奄觀銍艾

四章

曾孫之稼如茨如梁曾孫之庾如抵如京乃求千斯倉乃求萬斯箱黍稷稻粱農夫之慶報以介福萬壽無疆茨布地而生蒺藜也梁截水而橫略約也抵從水而起洲渚也京附地而隆陂陀也積穀之狀如此倉貯之本壤者也箱運之以補助他所者也

聞音曰畝滿罪切籽獎禮切疑魚起切士鉏里切
明謨郎切慶墟羊切右羽軌切否補義切有羽
軌切敏母鄙切京居良切慶墟羊切

總聞曰前兩詩不知何以見思古此詩又不知何以見
思古而傷今當是以自昔何為自古有年遂以為思古
以今適南畝遂以為傷今詩援古及今甚多且以田事
言之振古如茲續古之人皆及古以迄于今匪今斯今
皆及今雖未敢即以為某王之盛時亦未敢即以為某

王之亂世識者更詳

大田

一章

大田多稼既種既戒既備乃事以我覃耜俶載南畝播厥百穀既庭且碩曾孫是若

周制季冬令告民出五種命農既耦耕事修耒耜具田器所謂既備也孟春命布農事命田舍東郊善相丘陵阪險原隰土地所宜五穀所殖所謂俶載也孟

夏命野虞出行田原為天子勸農勞民毋或失時所
謂是若也孟夏驅獸毋害五穀季夏燒薙行水利以
穀草可糞田疇可美土疆所謂無害也見下章

二章

既方既皂既堅既好不狼不莠去其螟螣及其蟊賊無
害我田穡田祖有神秉畀炎火

狼莠人力所及螟螣蟊賊人力所不及神其以害田
之物而畀之火禱之辭也

三章

有渰萋萋興雨祈祈雨我公田遂及我私

雨我公田遂及我私民愛君也駁發爾私亦服爾耕
君愛民也民愛君以公為先君為民以私為先君愛
民以私為先耕謂公田也雨澤霈及公田因急私田
急于公緩于私之辭私則駁發耕則亦服急于私而
緩于公之辭當時君民之情可見

彼有不穫穉此有不斂穧彼有遺秉此有滯穗伊寡婦

之利

不獲不及獲者也不歛不及歛者也遺秉所弃者也
滯穗所留者也今北方刈獲弱婦幼童隨群掇拾于後
亦足度日南方亦謂之拾筭但不多耳

四章

曾孫來止以其婦子饁彼南畝田畯至喜來方禋祀以
其騂黑與其黍稷以享以祀以介景福

此蜡祭也大率此詩言收成之事為多似是索饗凡

田祭田祖居先田畯次之至此曾孫方來者觀蜡祭
同民福也

聞音曰稼讀作介今南人猶作此音叶戒事上止
切耜養里切畝滿罪切穀訖岳切碩常約切阜
此苟切好許厚切騰徒得切火虎隈切祀逸織
切福筆力切

聞訓曰穉說文幼禾也既刈有續生者今謂之稻
孫穢說文撮也秉說文禾束也穗說文禾成秀

也民間今猶有齋音一截兩截謂之一齋兩齋
與齋同亦有穗音一枝兩枝謂之一穗兩穗

聞物曰爾雅食心曰螟食葉曰螽食根曰蝥食節
曰賊說文蝗食禾節從虫說是說文又云螽蝗
也亦以賊為蝗如此則兩句再舉蝗也今田間
一種結網罟禾實者從冥恐是此意今俗謂螟
虫一種口截禾莖者從矛戈恐是此意今俗謂
蝗虫後股如鋸甚利二種皆不食禾而傷禾大

率漢儒之學兩物則分作兩種用四物則分作四種用假如虫類更增而物狀不可增則將如何古今遼遠虫之名實亦不可盡合今但多云蝗虫又曰蛉虫恐即是螟也其餘會粹之名多與古不侔

聞跡曰詩多稱南畝說見信南山後人言東臯猶可西疇遠失古意或謂多作西成然所謂農人告予以春及將有事于西疇正是春時非是秋

時或植杖而耘耔登東臯而舒嘯正是夏時非是春時大率後人乘意指東西南北為辭詩人亦率意但所見止在南所謂南東其畝也

總聞曰八蜡八方之神也各隨其所來之方祀之舉此禮需用函詩八章當分歌以樂八神鄭氏以為一先嗇二司嗇三農四郵表畷五貓虎六坊七水庸八昆虫恐未必然止祝辭可見土歸于宅土神一也宅神二也宅山之間也水歸于壑水神三也壑神四也壑巖穴之間

也昆蟲母作昆蟲神五也草木歸其澤草神六也木神七也澤神八也澤陂湖之間也昆當作蜚蟲之總名也既蜡收民息已故既蜡君子不興功蓋神人各來其所也

瞻彼洛矣

一章

瞻彼洛矣維水泱泱

此必宣王會諸侯東都之時也君子斥宣王也古之

明王莫如文武成康是時亦未宅洛

君子至止福祿如茨韎韐有奭以作六師

至洛會諸侯行大賚有賜之以韎韐之盛而在外統
師者如方叔之徒是也有賜之以韎之琫琕而內守
國者如張仲之徒是也

二章

瞻彼洛矣維水泱泱君子至止韎琕有珌君子萬年保
其家室

三章

瞻彼洛矣維水泱泱君子至止福祿既同君子萬年保其家邦

一章言以作六師兩章皆言保其家室保其家邦人情不欲多征唯欲內保故皆以萬年祝之

聞音曰茨前西切邦卜功切

聞用曰韎韐毛氏茅蒐草也鄭氏從之又茅蒐韎韐聲也毛氏又所以代韠也鄭氏從之言祭服

之韡也孔氏韡草名陳留人謂之菁韡又從毛
鄭也又韡韡以代韡其體合韋之蔽膝之衣是
韡又從毛鄭也與者用茅蒐之草染之故亦孔
氏集毛鄭之說頗明韡集韻音昧音末皆韋赤
色韡集韻士服如韡則韡韡殆類赤韡也禮韡
師掌教韡樂鄭氏讀如味飲食之味杜氏讀韡
為味莖著之味鄭氏讀如韡韡之韡謂衣赤韡
以舞也如旄人執旄以舞箛師敝箛以舞作樂

名也左氏有韎韋之跗注杜氏韎赤色跗注戎服若袴而屬於跗與袴連此殆類赤袴亦與赤韍相似據此以作六師當如周官韎師大饗舞韎樂亦可當如卻至衣韎韋之跗注亦可恐用周官之制為長

聞事曰福祿如茨非祝人君福祿也蓋人君及臣下之福祿爾下文所錫是也故末章又曰福祿既同言均及之君子萬年乃祝人君之辭

總聞曰此時方會東都振宗周而識者已于作師之辭多其識又先于矢其文德王曰還歸者也

裳裳者華

一章

裳裳者華其葉湑兮

裳當作常常棣也其葉湑兮華凋而葉盛也芸其黃矣葉漸變也或黃或白葉半槁也感常棣而思賢者雖厯歲時漸更柯葉常欲見斯賢也

我觀之子我心寫兮我心寫兮是以有譽處兮

二章

裳裳者華芸其黃矣我觀之子維其有章矣維其有章矣是以有慶矣

三章

裳裳者華或黃或白我觀之子采其四駱采其四駱六轡沃若

四章

左之左之君子宜之右之右之君子有之維其有之是以似之

言宜在王左右也

聞音曰寫賞羽切慶墟羊切白僕各切左七何切
今南人猶有此音吳氏以為未詳也 吳氏考
古音甚詳而采方音稍略也宜牛何切有羽軌
切似養里切

總聞曰江漢無曰予小子召公是似此當是召公之流

其先有令名而其後能繼世象賢者也

桑扈

一章

交交桑扈有鶯其羽

桑扈青雀也鶯黃栗留也當是暮春毛氏鄭氏以兩物為一物鶯然有文章恐非

君子樂胥受天之祜

春深鳥飛願君子樂此景以受其福此當是人君祝

諸侯之辭

交交桑扈有鶯其領君子樂胥萬邦之屏

此當是人君譽諸侯之辭

三章

之屏之翰百辟為憲不戢不難受福不那

四章

兕觥其觶旨酒思柔彼交匪敖萬福來求

此當是人君戒諸侯之辭不可自戢而不肯為不可

自難而不敢為如無勉意自生退心則福不多也不
戢不難如諸葛亮是也不可自教而不勤如無逸意
常存勞心則福來求也彼交匪敖如陶侃是也

聞音曰祐侯古切翰胡千切憲虛言切難乃多切
總聞曰當是諸侯來朝而歸國餞送之際美戒兼存下
章鴛鴦似是諸侯答君之辭

鴛鴦

一章

鴛鴦於飛畢之羅之君子萬年福祿宜之

畢盡也張羅者既盡則鴛鴦可以無慮也所以每章歸福于其君謝之辭也

二章

鴛鴦在梁戢其左翼君子萬年宜其遐福

鴛鴦斂翼而休已可斂身而息也

三章

乘馬在廐摧之秣之君子萬年福祿艾之

四章

乘馬在廐秣之推之君子萬年福祿綏之

乘馬亦休息不慮鞭策已亦可休息不慮譴呵也

聞音曰羅鄰知切福筆力切秣莫佩切艾魚肺切
聞物曰鴛鴦雙棲乃能宿雄以右掩左雌以左掩
右飛類皆然

總聞曰諸侯既安心斯展力當是其君以情相留乘馬
寘之于廐而未使登塗也故諸侯即事以攄情不知的

在何朝當似韓侯入覲出祖之時也

頽弁

一章

有頽者弁實維伊何

當是王者親戚平時憂疑至是燕飲之際其情稍通也

爾酒既旨爾殽既嘉豈伊異人兄弟匪他薦與女蘿施于松柏

言此無他人唯我同氣下所謂具來必皆與非一人也下又謂甥舅必又有母黨也可謂至親可以略抒此懷我不能自植惟恃松栢以為力衰之辭也下章亦然

未見君子憂心奕奕既見君子庶幾悅懌

我未見不能無疑既見其疑稍釋庶幾未敢必其無他虞也下章亦然

二章

有頍者弁實維何期爾酒既旨爾殽既時豈伊異人兄
弟具來薦與女蘿施于松上未見君子憂心忉忉既見
君子庶幾有臧

三章

有頍者弁實維在首爾酒既旨爾殽既阜豈伊異人兄
弟甥舅如彼雨雪先集維霰

如雪先集霰漸至于大雪如讒先浸潤漸至于大禍
當是其端有緒其事將成也

死喪無日無幾相見樂酒今夕君子維宴

不知死當在何日見亦無幾時姑樂今夕而已訣之辭也

聞音曰嘉居何切他湯何切柏逋莫切奕弋灼切
懌弋灼切來陵之切慄被旺切臧才浪切阜房
缶切舅不九切

總聞曰禮貌饌具非不曲盡而我心終不能保言其人
不可測也宋明帝齊高宗猜忍之徒其于親戚骨肉之

間多然

車牽

一章

間闕車之牽兮思變季女逝兮

此士大夫欲得賢女以自慰也尋詩士大夫之心甚切當是此女之譽甚美故此士之情甚深幸而末章得如所願也

匪飢匪渴德音來括雖無好友式燕且喜

當是嚴車以待迎而媒妁未諧聘幣未通意不在飲
食而在碩女外雖無良朋而中乃有好友殊可喜也
二章

依彼平林有集維鵲辰彼碩女令德來教式燕且譽好
爾無射

鵲野雉也雉有謂之雉媒言安得如此人早得碩女
來通教言此樂無有厭也因見野雉有感也

三章

雖無旨酒式飲庶幾雖無嘉殽式食庶幾雖無德與女
式歌且舞

四章

陟彼高岡析其柞薪析其柞薪其葉湑兮鮮我覲爾我
心寫矣

柞柞木也析良木為薪當用斧娶碩女為妻當用媒
南山伐柯之詩皆然其葉甚茂而未能析蓋少肯與
我為媒未得與碩女相見也又見茂林有感也

五章

高山仰止景行行止四牡騤騤六轡如琴觀爾新婚以
慰我心

往迎婚也

聞音曰牽下瞎切逝尺列切集韻往也吳氏牽逝
二韻未詳蓋未考此友羽軌切鵠居妖切教居
爻切射都故切薪思將切滑思叙切寫賞羽切
仰五剛切行戶郎切

總聞曰尋詩不見思君得女之意如此則似太褻也此
欽慕婦賢而難得婦相見及此願有期則慰其心皆動
于已情非施于君也

青蠅

一章

營營青蠅止于樊豈弟君子無信纔言

二章

營營青蠅止于棘讒人罔極交亂四國

三章

營營青蠅止于榛讒人罔極構我二人

當是為讒有端而未成也止于樊棘榛之間未至于
啗膚然不可不預慮也

聞音曰國越逼切

總聞曰二人非君臣之辭必其徒也謂君與我猶可孔
氏以二人為人君與讒人不唯非君臣之禮亦語勢不
順君子則指君也

賓之初筵

一章

賓之初筵左右秩秩

言延賓初入席甚整肅有次第也周制有秩酒秩膳
皆謂有常度也

籩豆有楚斝核維旅酒既和旨飲酒孔偕鐘鼓既設舉
醕逸逸止大侯既抗弓矢斯張射夫既同獻爾發功發
彼有的以祈爾爵

既延賓具籩豆殽核又具鐘鼓又具弓矢奏其發矢之功中的之數勝者飲不勝也

二章

籥舞笙鼓樂既和奏烝衍烈祖止以洽百禮百禮既至止有壬有林錫爾純嘏子孫其湛其湛曰樂各奏爾能既起射具樂舞笙鼓而獻先祖其禮至百又盛大于初嘏傳尸辭以飲福也飲福既畢又各奏其閑射之能以相校也

賓載手仇室人入又酌彼康爵以奏爾時

既奏能又起射以手為匹言分耦也酌爵以飲不勝
各奏其時言不踰所當酌之時告之於尸也初筵大
率兩射賓飲酒既遍之後一也尸受饗既畢之後一
也其率禮如此所謂秩也

三章

賓之初筵止溫溫其恭

再舉初筵言勞賓饗神皆如禮上二章是也過此則

酒皆酣禮皆廢下二章是也

其未醉止威儀反反曰既醉止威儀幡幡舍其坐遷屢舞僂僂其未醉止威儀抑抑曰既醉止威儀忸忸是曰既醉不知其秩

向之秩今皆忘也

四章

賓既醉止載號載呶亂我邊豆止屢舞僂僂是曰既醉不知其郵止側弁之俄屢舞僂僂既醉而出並受其福

醉而不出是謂伐德飲酒孔嘉維其令儀

數其狀也有醉而出者則受福之人言不至蹈害也
有醉而不出者則伐德之人必至喪善也亦有飲而
甚嘉不失其令儀蓋亦有賢者不皆小人也所以下
章凡此飲酒或醉或否也

五章

凡此飲酒或醉或否既立之監或佐之史彼醉不臧不
醉反恥

監史所以糾飲酒過度者也至醉者固為不善當糾之也反以不醉為恥監史不以糾醉為職乃以縱醉為能也五代閩之王氏若此

式勿從謂無俾大怠

大率醉者諱人勸止而醒者不忍坐視也式勿從謂言勿從而告之也無俾大怠但可扶持使不至于太顛仆也

匪言勿言匪由勿語由醉之言俾出童叟三爵不識矧

敢多又

醒者相與為戒非所當言者勿言非所當從者勿語
謂勸止也若可從而言莫若勸其出童持車之僕也
殺駕車之羊也言乘車而去也然三爵之後則不識
義理不識親朋童殺之言已過况敢多言多言則醉
者興怒見犯也

聞音曰兩舉賓之初筵即大章首題也初賓之初
筵下行一章次賓之初筵下行二章兩大章並

一句單入其餘不然旨旁紐作陟叶逸設書實
切抗居郎切的丁樂切湛持林切仇又相叶又
旁紐作尤康旁紐入聲作恪叶爵爾旁紐平聲
作而叶時此隨句取叶也大率不叶者委曲取
叶亦無有不叶者反芬邇切郵旁紐作宥叶豆
醉者阻人勸止之聲若又今西北人猶有此聲
大率厭却煩聒雖不醉亦多稱又出尺律切福
筆力切嘉居何切儀牛何切否補美切史爽士

切急養里切殺公土又夷益切

聞事曰手左右出耦亦左右出故耦從手也舊改
手作耦不必

聞用曰古者車乘首以馬次以牛次以羊輕小之
車羊駕之所謂灑鹽者也

聞人曰周制酒正不唯以式法授酒材所謂酌數
器量皆掌今飲即王之燕飲共其計酒正奉之
計謂獻酌多少監或謂此史即府史之屬左氏

屠蒯請佐使尊恐是

總聞曰此同在席醒者談醉者之狀當怒而不怒當責而不責乃更委曲保護醒者必慈祥長厚之人憚凶德憐狂夫而又遠害者也令儀蓋斯人耶

詩總聞卷十四

欽定四庫全書蒼要卷九百十七

經部

詩總聞卷十五

宋 王質 撰

魚藻

一章

魚在在藻有頌其首

當是朝廷以魚侑酒以豈為樂而勸王者之飲喜功
成治定也說文豈還師振旅之樂從心從豈者非
王在在鎬豈樂飲酒

二章

魚在在藻有莘其尾王在在鎬飲酒樂豈

三章

魚在在藻依于其蒲王在在鎬有邠其居

此飲酒畢奏樂也願安所處言人情愛君上如今言甚勞少歇也

聞音曰此詩上下句皆對叶

總聞曰治亂之世辭意氣象自可見無疑似可推演得

以委曲拔援者皆盛時之詩強生辭以為亂世則恐錯亂情實非考古之正法也

采菽

一章

采菽采菽筐之筥之

當是諸侯來朝人君致禮都人登山臨水觀之後世郭子儀季晟之流來京師都人以為盛事或見歌詩恐殆亦類此

君子來朝何錫予之雖無予之路車乘馬又何予之玄
衮及黼

路車乘馬玄衮及黼可謂大賜而尚言無予者自以
為薄也謙之辭也下章旂鸞駟赤芾邪幅皆次第
錫賚者也故初言予之後言申之

二章

威弗檻泉言采其芹君子來朝言觀其旂其旂淠淠鸞
聲嘒嘒載駟載駟君子所屆

三章

赤芾在股邪幅在下彼交匪紆天子所予樂只君子天子命之樂只君子福祿申之

四章

維柞之枝其葉蓬蓬樂只君子殿天子之邦樂只君子萬福攸同平平左右亦是率從

言君臣和順也安平在王之側有令則率從恭之辭也

五章

汎汎楊舟，紉纚維之樂只。君子天子葵之樂只。君子福祿，晚之優哉游哉，亦是戾矣。

亦言君臣和順也。優游處王之側，有名則至，亦恭之辭也。

聞音曰：予弋渚切，馬滿補切，泉才勻切，旂渠斤切。屈居氣切，下後五切，命彌并切，邦卜工切。哉將黎切矣，作平音。

總聞曰采菽者登山采菽為食而觀者也采芹者臨水
采芹為食而觀者也枝者既飽依樹而立而觀者也楊
舟或汎或維追逐而觀者也故詩稱言觀此為蓋終日
之觀則備終日之饌今人出遊出觀稍從容長遠者多
然

角弓

一章

駢駢角弓翩其反矣

弓向外則弦上而矢發反則無用俗謂之反張病有此狀者難療

兄弟昏姻無胥遠矣

二章

爾之遠矣民胥然矣爾之教矣民胥傲矣

三章

此令兄弟綽綽有餘不令兄弟交相為瘡

令兄弟雖相遠能安處不令則交為相害言怨心生

也

四章

民之無良相怨一方受爵不讓至于已斯亡

言情不通也爵相爭而不相遜至其末則情皆亡言
情從讓起從爭喪

五章

老馬反為駒不顧其後如食宜鯁如酌孔取

以老馬為駒已亦將有老時也食量所鯁而酌量所

取則不傷不量飢飽而食不忖多寡而酌亦不顧其後也言有後患也當是親戚之間有小人以年而先于衆者又當是親戚之間有君子以惡而遠其人者又不讓以義官使處下位故小人懷忿驚肆忍毒尋詩皆勸君子慮後患者也

六章

毋教猱升木如塗塗附君子有徽猷小人與屬

猱升木不待教塗附塗不待附言兄弟之情自然非

由人力也君子小人雖異然同氣相連亦自其性也此必有兄弟之中小人以異趣害君子詩人言此天性不以君子小人而別也

七章

雨雪瀼瀼見睍曰消莫肯下遺式居婁驕

言小人之惡亦易回稍下心與之則翻然既不肯降意小人又自處多驕無恠小人之欲快其志也言君子亦不善待小人咎之辭也

八章

雨雪浮浮見覲曰流如蠻如髦我是用憂

小人蠻也蠻人心多悍君子髦也髦士心多正恐不
勝小人是可憂也故再三勸君子少屈以下小人愛
之辭也

聞音曰反芬邇切遠於圓切瘡羊汝切讓如陽切
後下五切屬殊遇切髦莫侯切

總聞曰詩人固消小人而長君子亦屈君子而下小人

而况骨肉之間雖稍下之何足為屈也以五剛決一柔亦必徃而說決而和故君子懲小人亦必有道也

菀柳

一章

有菀者柳不尚息焉

柳菀當是夏時今歲又過半而為惡尚未息凡人以一時為一變時再變而惡如故處心寬者靜以待後也上帝甚蹈無自暱焉俾予靖之後予極焉

以天自警也無也俾也後也皆使之辭也蹈動也天
意甚相動勿自親但守靜徐觀所至也言俟其惡稍
息

二章

有苑者柳不尚惕焉上帝甚蹈無自察焉俾予靖之後
予邁焉

三章

有鳥高飛亦傳于天彼人之心于何其臻曷予靖之居

以凶矜

言不若高飛而避害也彼人斥在上也其心何所不至哉可守靜而待其居我凶危之地也決之辭也

聞音曰瘵子例切邁力制切天鐵因切

總聞曰此當危疑自寬解以待者也世固有用此道而安亦有用此道而危言可待者善人而偶誤用心不待者惡人而稔熟為惡也故末章有斷制之辭

都人士

一章

彼都人士狐裘黃黃

當是都人之賢士君子賢女相為夫婦而去都都人思之者也此似餞送之辭

其容不改出言有章行歸于周萬民所望

當是其士既賢而其女又淑先章全言士者本其夫也後章夫婦併言

二章

彼都人士臺笠緇撮彼君子女綢直如髮我不見兮我心不說

三章

彼都人士充耳琇實彼君子女謂之尹吉我不見兮我心苑結

尹氏吉氏婚姻之著姓舊說亦有此理二姓同出尹吉甫一以官為氏一以字為氏不必改作姑

四章

彼都人士垂帶而厲彼君子女卷髮如蠆我不見兮言從之邁

五章

匪伊垂之帶則有餘匪伊卷之髮則有旃我不見兮云何盱矣

言士則指其衣服言女則指其髮旃不欲斥言故舉其在身之物以思其人也

聞音曰望無方切撮祖悅切髮方月切說欲雪切

結激質切屬落盖切盱叶禡不用矣若用矣旁
紐作平聲協兮

總聞曰此必在東都而歸西周者也雖在東必以西為
宗故言周道周京皆指故都為宗周三家無初章止三
章唯毛氏有之大要在行歸于周一句豈可闕也行平音
采綠

一章

終朝采綠不盈一匊予髮曲局薄言歸沐

二章

終朝采藍不盈一襜五日為期六日不詹

三章

之子于狩言褭其弓之子于釣言綸之繩

四章

其釣維何維魴及鱖維魴及鱖薄言觀者

黍苗

一章

芄芄黍苗陰雨膏之悠悠南行召伯勞之

二章

我任我輦我車我牛我行既集蓋云歸哉

三章

我徒我御我師我旅我行既集蓋云歸處

四章

肅肅謝功名伯營之烈烈征師召伯成之

五章

原隰既平泉流既清名伯有成王心則寧

隰桑

一章

隰桑有阿其葉有難既見君子其樂如何

二章

隰桑有阿其葉有沃既見君子云何不樂

三章

隰桑有阿其葉有幽既見君子德音孔膠

既見非已見也想像既見之後所說之情當如此也

四章

心乎愛矣遐不謂矣中心藏之何日忘之

心甚愛斯賢而以遠不能告語為恨徒深藏而不忘也此必有欲言不得者也

聞音曰難乃多切沃鬱縛切幽於交切愛許既切
總聞曰君子所居有隰有桑是在野也思在野而不得見則必在位而不能往者也其詳見白華

白華

一章

白華菅兮白茅束兮之子之遠俾我獨兮

有花曰管無花曰茅其色皆白大率此詩所引山野
氣象為多草木之類則管茅稻田桑薪之類鳥獸則
鷺鶴鴛鴦天則雲露地則漉池扁石家則行竈漁梁
皆山廬野宅所見所有者也

二章

英英白雲露彼菅茅天步艱難之子不猶

天步如此艱難而不得與此人同謀也古以星土辨九州之地封域皆有分星畧見丹元子步天歌天步謂此

三章

漭池北流浸彼稻田嘯歌傷懷念彼碩人

四章

樵彼桑薪印烘于燧維彼碩人實勞我心

五章

鼓鐘于宮聲聞于外念子惻惻視我邁邁

此所謀之大槩也必是人君祗席之間有所隱慝今則外彰念子不可見則愁不申視我無與同則意不悅其事迫而真情急也

六章

有鷺在梁有鶴在林維彼碩人實勞我心

七章

鴛鴦在梁戢其左翼之子無良二三其德

自此人之外無良朋以相助所與處者皆二三之人
豈可共謀也

八章

有扁斯石履之卑兮之子之遠俾我底兮

扁小石也此人當在巖谷之下故曰卑也初則傷次
則勞次則病思之極也

聞音曰茅莫侯切田地因切燬市林切邁力制切
底祈支切

聞用曰熤燿也今行竈

聞跡曰滌池與鄆池合在咸陽鄭氏鄴鎬之間水
北流而不指其的

總聞曰此與隰桑之意同亦必與隰桑之人同隰桑之
事尚淺故其辭未至于甚白華之事已深故其辭不勝
其切此必事于宗社人民而非尋常者也隰桑之君子
即此之碩人此之碩人即此之子當時在朝既有賢
者在野亦有賢者惜不能相會以為謀而徒勞思悵望

此在朝者必有志而寡助在野者必有才而不用者也

繇蠻

一章

繇蠻黃鳥止于丘阿

當時重臣出行而下士冗役告勞者也

道之云遠我勞如何飲之食之教之誨之命彼後車謂之載之

聞其告勞而旋其憫心亦必賢者當是營謝之流也

二章

緜蠻黃鳥止于丘隅豈敢憚行畏不能趣飲之食之教
之誨之命彼後車謂之載之

三章

緜蠻黃鳥止于丘側豈敢憚行畏不能極飲之食之教
之誨之命彼後車謂之載之

黃鳥當是春時春多雨丘多泥此適遠所宜告勞也
聞音曰食疾二切載子麗切側莊力切

總聞曰飲食憐其飢載憐其勞而又教誨者言分有貴
賤任有勞佚使以理遣也此不止營謝之流恐即召伯
黍苗陰雨正是此瓠所以重使人意及此也識者更詳
瓠葉

一章

幡幡瓠葉采之亨之

當是在野君子相見為禮者食瓠當是夏時

君子有酒酌言嘗之

二章

有兔斯首炮之燔之君子有酒酌言獻之

初章言瓠葉為蕹耳大要以兔侑酒也故三章連及之北人膳羞多喜用禽獸而凡品以兔為貴射獵亦以得兔為勝

三章

有兔斯首燔之炙之君子有酒酌言酢之

四章

有鬼斯首燔之炮之君子有酒酌言醕之

鬼以首言猶今言一頭兩頭也西人凡物皆以頭言
于人亦以頭數

聞音曰亨鋪郎切獻虛言切炙陟略切炮蒲侯切
總聞曰此時當有遁隱在野者數詩皆有此意隰桑所
愛之君子白華所念之碩人與此瓠葉亨瓠燔鬼之君
子恐皆此人得非隰桑白華欲見而不得者至是或假
事以相見或將命以相見皆不可得而知疑其前詩有

不勝思慕之情此詩有不任欣喜之狀此必有志投而
意契者識者更詳

漸漸之石

一章

漸漸之石維其高矣

西北少山東南多山大率山水皆起西而赴東南至
海而止西北不甚習見故以為勞也

山川悠遠維其勞矣武人東征不皇朝矣

不皇猶不遑也古字通用不暇朝而見王不暇出而歸家其餘皆不暇它務將帥迫遽如此則事勢危急可知尋詩前二章初行之時後一章久役之時也毛氏鄭氏以皇為王語勢不順

二章

漸漸之石維其卒矣山川悠遠曷其沒矣武人東征不皇出矣

三章

有豕白蹄烝涉波矣月離于畢俾滂沱矣武人東征不
皇他矣

豕江豚也此物出則雨兆月近畢則雨近箕則風故
謂之畢雨箕風言西北之人不暗東南見豚出于江
月近于畢則懷憂也江豚惟自岐出者大江有之不
入他流所謂江烟漠漠江雨來天意為霖不干汝毛
氏將久雨則豕進涉水波鄭氏豕唐突難禁制尤躁
疾者離其牧處涉入水波今人豢豕極多未見如此

者也

聞音曰沒莫筆切

聞字曰集韻漸斬皆同不必作斬

聞物曰江豚大畧猪首魚尾有兩細足微白全身
皆肉不堪食可取膏湖湘間人多用之

總聞曰東南夷見于詩者淮夷荆舒得人則有喜江山
之心不得人則有懼山川之意亦各係其人也觀此詩
及東山江漢諸詩可見尋詩其人非不難冒盡瘁亦時

節不嘉人情少舒觸境皆非美氣象爾

苔之華

一章

苔之華芸其黃矣心之憂矣維其傷矣

二章

苔之華其葉青青知我如此不如無生

三章

牂羊墳首三星在留人可以食鮮可以飽

牂羊牝羊也墳當作羴字轉恐亦通用牡羊也牝羊而牡首豈有此理心星在天而在留亦豈有是理言雌雄變易上下顛倒此時但得食已為過求飽則難也言世路不嘉也

聞音曰飽補叔切

總聞曰見茗華而感世態漸就凋不復勞也大要在牂羊三星二句此其所以無生意也此必愬人之詩故曰知我如此

何草不黃

一章

何草不黃何日不行何人不將經營四方

二章

何草不玄何人不矜哀我征夫獨為匪民

言不以民待下也

三章

匪兕匪虎率彼曠野哀我征夫朝夕不暇

我非虎非兕而常在野哀之辭也

四章

有芄者狐率彼幽草有棧之車行彼周道

狐在野人在里各其所也狐在草而我挽車常在道
狐之不如甚哀之辭也

聞音曰行戶郎切玄胡均切野上與切暇後五切
總聞曰草自黃而玄與苔自花黃而葉青同為時節之
變苔花漸謝春夏時也草色漸槁秋冬時也當時所歷

之時不同苔之花何草不黃之詩一引羊留起興一引
兕虎狐起興又皆以山卉山蕪為辭當是在野者也或
士與民未可審知爾

詩總聞卷十五

謹案卷十三第四頁後二行簋則殮者也則字疑誤

第十二頁後二行後有復者原本訛作復有後者今改

第十八頁後二行以往烝嘗原本烝訛蒸今改
第二十二頁後八行而言東南也原本東南訛南東今改

第二十三頁前四行有义路也刊本文訛義今改

前五行蓋晉嚮齊刊本嚮訛享今改


第二十四頁後六行商周鼎卣原本卣訛鹵今改

卷十五第六頁前三行詩人言此天性原本性訛

情今改

第十頁前五行大要在行歸于周一句原本句訛

自今改



覆校官編修臣查瑩

校對官庶吉士臣朱攸

謄錄監生臣孟錫山